



30. august 2024

UKA 2024/147

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Qanoq iliorluta Nunatsinni isikkamik arsartarneq siuarsarsinnaaneripput inuussutissarsiutigilersinnaanissaanullu periarfissiisoqarsinnaanersoq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Aqqalu C. Jerimiassen, Atassut)

Amerikap avannarliup nunavittaani inuussutissarsiutingalugu isikkamik arsarneq siuariartorpoq, tusaamasallu pisoqalimaaleraangamik Europamiit USA-mi klubbinut nuuttarneri takornartaanatik, aningaasarsiornikkullu nunallu avammut ussassaarutigineranuttaaq iluaqutaqisumik.

Major League Soccer (MLS) USA-mi Canadamilu isikkamik arsamik inuussutissarsiutingalugu pivoq. Qiviariarutsigulu angissusaat nunat marluk; Houston Dynamo taavalu Toronto FC unammisaagunik, akunnerit pingasut sinnerlugit angalasariaqarput, taamaaliortarpulli. Europamut qiviarutta, Spaniami La liga kisiat eqqarsaatigiinnassagaanni, Spaniami klubbit avannarlarsaasa ilaat Athletic Bilbao, taavalu kujallerpaagunartoq afrikap sineriaani qeqertanittoq Tenerife, akunnerit pingasutaaq sinnerlugit angalasarput. Unammiartarpullu ungasissuseq aporfigivallaanngikkaluarlugu.

Nunatsinni isikkamik arsarneq nuannarineqarluarpoq, inuussutissarsiutigivillugulu ingerlanneqalersinnaanissaa suli maanna periarfissagissaarneruleriartorpoq akitsinnut timmisartuussisarneq Nuummiit ammaqinneqarmat. Illoqarfiillu pingaarnersaani taamatut ingerlatsilersinnaaneq periarfissatut eqqarsaatigisariaqarparput.

Naalagaaffeqatigullu qivialaariarutsigit, Savalimmiuni isikkamik arsarneq tamaarsuullugu siuarsarneqarpoq, allaallumi maanna Champions League-imut killittalereersimalerput tupaallaataaqisumik. Sooq tupaallatsitsippat, nalaatsornerinnaava? Naamik, inerisaramikku angusaqarput.

Takorluulaartigu nunatsinniit MLS Cup-imut nunatsinnit angusarissaartoqartoq, inuiaqatigiittut ataatsimoornerusinnaanermuttaaq iluaqutaassaqaq kinaassusilerngulluni avissaartuunniarnersuunngittoq.



Timersorneq ataatsimoortitsisarpoq, tusaamasat ineriartortullu (prospects) ataatsimoortarput naligiillutik, takorluuinnarsinnaavarpullu qanoq torratsigissanersoq Nuummut LA Galaxy-kkut unammiarlutik tikittut.